



Broj: 01-50-1-15-23/16
Sarajevo, 12.1.2016.

БОСНА И ХЕРЦЕГОВИНА
ПАРЛАМЕНТАРНА СКУПШТИНА БОСНЕ И ХЕРЦЕГОВИНЕ
САРАЈЕВО

PRIMLJENO 22-01-2016			
Organizaciona jedinica	Klasifikaciona oznaka	Redni broj	Broj priloga

ZAPISNIK

23. sjednice Predstavničkog doma Parlamentarne skupštine Bosne i Hercegovine, održane 12.1.2016.

Sjednica je počela u 10,10 sati. Prisustvovalo je 40 poslanika.

Odsustvo je opravdao poslanik Saša Magazinović.

Sjednici su prisustvovali predsjedavajući i članovi Vijeća ministara BiH.

Iz međunarodnih organizacija sjednicu su pratili predstavnici OHR-a, OSCE-a, USAID-a i predstavnici britanske i američke ambasade, a iz nevladinih organizacija prisustvovao je predstavnik CCI-ja.

Predsjedavajuća Doma Borjana Krišto rekla je da će poslanicima, u skladu s članom 171. Poslovnika, na početku sjednice, a prije rasprave o dnevnom redu, biti omogućeno postavljanje poslaničkih pitanja u usmenoj formi.

U skladu s članom 172. Poslovnika, najave za postavljanje poslaničkih pitanja u usmenoj formi dostavili su sljedeći poslanici:

- **Damir Bećirović** – ministru vanjskih poslova BiH;
- **Amir Fazlić** – ministru vanjskih poslova BiH (poslanici Bećirović i Fazlić postavili su pitanja u usmenoj formi na 19. sjednici Doma, ali nisu dobili usmeni odgovor zbog odsustva ministra vanjskih poslova BiH, koji nije prisustvovao ni prošloj sjednici Doma. Naknadno je dostavljen odgovor u pisanoj formi na navedena pitanja, ali će poslanicima biti omogućeno da postave pitanja u usmenoj formi i danas, ako to žele);
- **Miroslav Milovanović** – ministru vanjske trgovine i ekonomskih odnosa BiH;
- **Dušanka Majkić** – predsjedavajućem Vijeća ministara BiH;
- **Mirsad Isaković** – predsjedavajućem Vijeća ministara BiH;
- **Hanka Vajzović** - predsjedavajućem Vijeća ministara BiH;
- **Senad Šepić** - predsjedavajućem Vijeća ministara BiH;
- **Salko Sokolović** - predsjedavajućem Vijeća ministara BiH;
- **Mirsad Mešić** – ministrici odbrane BiH;
- **Nermina Kapetanović** – ministru pravde BiH;
- **Damir Arnaut** - ministru pravde BiH;
- **Jasmin Emrić** – Ministarstvu komunikacija i prometa BiH.

Ove najave su, u skladu s članom 172. Poslovnika, dostavljene predsjedavajućem Vijeća ministara BiH i onom članu Vijeća ministara BiH na koga se pitanje odnosi.

Predsjedavajuća je podsjetila da je osiguran direktan TV prijenos ovog dijela sjednice, u skladu s članom 171. stav (1) Poslovnika.

Nakon ovih napomena, pristupilo se usmenom postavljanju poslaničkih pitanja i davanju odgovora redoslijedom dostavljanja najava.

Damir Bećirović i Amir Fazlić uputili su pitanja ministru vanjskih poslova BiH, ali su se, zbog odsustva ministra sa sjednice Doma, izjasnili da će pitanje postaviti na sjednici kojoj ministar bude prisustvovao.

Miroslav Milovanović

Pitanje upućeno ministru vanjske trgovine i ekonomskih odnosa BiH: „Kolika je ukupna količina u kilogramima i kolika je ukupna vrijednost izvezenog mlijeka i mliječnih proizvoda u EU otkako je ukinuta zabrana izvoza u EU?“

Ministar vanjske trgovine i ekonomskih odnosa BiH Mirko Šarović dao je odgovor. Poslanik **Miroslav Milovanović** komentirao je dati odgovor.

Dušanka Majkić uputila je pitanje predsjedavajućem Vijeća ministara BiH, ali se zbog njegovog odsustva sa sjednice Doma izjasnila da će pitanje postaviti na sjednici kojoj predsjedavajući bude prisutan.

Mirsad Isaković

Pitanje upućeno predsjedavajućem Vijeća ministara BiH: „Kada možemo očekivati zakon o trgovini putem interneta u BiH?“

Mirsad Isaković pročitao je pitanje, te se izjasnio da će ga ponoviti na sjednici kojoj predsjedavajući bude prisutan.

Hanka Vajzović

Pitanje upućeno predsjedavajućem Vijeća ministara BiH: „Koliki su ukupno ostvareni prihodi UIO po svim osnovama gazdovanja graničnim prijelazima i carinskim terminalima, i to na godišnjem nivou, počev od 2010. zaključno s krajem 2015. godine? Koliko je u UIO za isti taj period (po godinama, 2010.- 2015.) sredstava iz budžeta BiH uloženo u iste te granične prijelaze i terminale, i to po različitim osnovama: redovno održavanje, rekonstrukcija, nabavka zajedničke opreme i sl.? Koliko je sredstava u budžetu UIO za 2016. godinu planirano da se uloži u tekuće održavanje graničnih prijelaza i carinskih terminala?“

Hanka Vajzović uputila je pitanje predsjedavajućem Vijeća ministara BiH, ali se zbog njegovog odsustva sa sjednice Doma izjasnila da joj se odgovor dostavi u pisanoj formi.

Senad Šepić

Pitanje upućeno predsjedavajućem Vijeća ministara BiH: „Šta je aktuelno Vijeće ministara BiH konkretno uradilo do sada i koji su precizni planovi za 2016. godinu za povećanje broja zaposlenih, posebno zapošljavanja mladih i sprečavanja iseljavanja iz BiH, s akcentom na sprečavanje odlaska iz naše zemlje mladih, obrazovanih ljudi?“

Senad Šepić uputio je pitanje predsjedavajućem Vijeća ministara BiH, ali se zbog njegovog odsustva sa sjednice Doma izjasnio da će pitanje postaviti na sjednici kojoj predsjedavajući bude prisutan.

Salko Sokolović

Pitanje upućeno predsjedavajućem Vijeća ministara BiH: „Da li je realno očekivati da zahtjev za članstvo u Evropsku uniju Bosna i Hercegovina podnese u januaru ove godine ili se taj rok mora prolongirati s obzirom na to da dio obaveza još nije realiziran? Da li je Vijeće ministara BiH „stvarno“ usvojilo mehanizam koordinacije, bez koga BiH ne može podnijeti vjerodostojan zahtjev za članstvo?“

Salko Sokolović uputio je pitanje predsjedavajućem Vijeća ministara BiH, ali se zbog njegovog odsustva sa sjednice Doma izjasnio da mu predsjedavajući da odgovor na narednoj sjednici ili da mu se odgovor dostavi u pisanoj formi.

Mirsad Mešić

Pitanje upućeno ministrici odbrane BiH: „Da li je tačna informacija da se helikopteri OSBiH remontuju, kako se to navodi i objavljuje u dnevnom listu Dnevni avaz, u firmi koja ima jednog zaposlenog i jednu iznajmljenu garažu za rad? Ako je ta informacija tačna i Vi je znate, šta ste preduzeli protiv takvih radnji?“

Ministrica odbrane BiH Marina Pendeš dala je odgovor. Poslanik Mirsad Mešić komentirao je dati odgovor.

Nermina Kapetanović

Pitanje upućeno ministru pravde BiH: „Šta je Ministarstvo pravde BiH do sada preduzelo na izradi državne strategije o civilnom društvu, odnosno kada će uputiti u parlamentarnu proceduru prijedlog zakona o zajedničkom registru nevladinih organizacija, udruženjima građana, koji će omogućiti uspostavljanje centralizirane baze podataka?“

Ministar pravde BiH Josip Grubeša dao je odgovor. Poslanica Nermina Kapetanović komentirala je dati odgovor.

Damir Arnaut

Pitanje najavljeno predsjedavajućem Vijeća ministara BiH, tražen odgovor od ministra pravde BiH: „Kada će Vijeće ministara BiH preduzeti mjere koje se traže u poglavlju 4.2.3. Izvještaja o napretku po pitanju okoliša i klimatskih promjena, odnosno konkretno kada će se: 1) objaviti i početi primjenjivati dokument o doprinosu države očekivanom Sporazumu UN-a o klimatskim promjenama iz 2015. godine; 2) uspostaviti usklađeni zakonski okvir za zaštitu okoliša i klimatske promjene, unaprijediti strateško planiranje i provođenje *acquisa* u ovim oblastima; te 3) ojačati administrativni kapaciteti i sistem nadzora, te unaprijediti međuinstitucionalna koordinacija između svih nadležnih organa?“

Zamjenik predsjedavajućeg Vijeća ministara BiH i ministar vanjske trgovine i ekonomskih odnosa BiH, Mirko Šarović dao je odgovor. Poslanik Damir Arnaut izrazio je nezadovoljstvo odgovorom i zatražio da se na navedeno pitanje dostavi i odgovor u pisanoj formi.

Jasmin Emrić

Pitanje najavljeno Ministarstvu komunikacija i prometa BiH: „Koje su projektne aktivnosti, u kojem obuhvatu i vremenskom periodu planirane radi remonta i obnove, odnosno infrastrukturne rehabilitacije dionice jednotračne pruge Dobrljin, tj. granica s Republikom Hrvatskom, Bosanski Novi ili Novi Grad-Bihać-Osredci-granica s Republikom Hrvatskom ili tzv. unske pruge, kao i pripadajuće željezničke infrastrukture?“

Zamjenik ministra komunikacija i prometa BiH Saša Dalipagić rekao je da odgovor nije pripremljen jer su u Ministarstvu pitanje dobili dan prije sjednice, te da će odgovor dati na nekoj od narednih sjednica, a da će biti dostavljen i u pisanoj formi. Jasmin Emrić izrazio je nezadovoljstvo, jer je o ovoj temi već vođena rasprava u Domu.

U vezi sa izmjenom dnevnog reda sjednice, predsjedavajuća je napomenula sljedeće:

S ranijeg dnevnog reda skinute su:

Tačka 6. – Prijedlog zakona o izmjeni Krivičnog zakona Bosne i Hercegovine, predlagači: poslanici iz klubova SNSD-a i SDS-a, broj: 01,02-02-1-27/15, od 17.12.2015. (prvo čitanje) – skinuta s dnevnog reda sjednice u skladu sa zahtjevom Ustavnopravne komisije

Tačka 7. – Prijedlog zakona o Ustavnom sudu Bosne i Hercegovine, predlagači: poslanici iz klubova SNSD-a i SDS-a, broj: 01,02-02-1-28/15, od 17.12.2015. (prvo čitanje) - skinuta s dnevnog reda sjednice u skladu sa zahtjevom Ustavnopravne komisije

Tačka 9. - Prijedlog zakona o korištenju i upravljanju imovinom u državnoj svojini Bosne i Hercegovine, predlagači: poslanici Šemsudin Mehmedović i Zaim Backović, broj: 01-02-1-35/15, od 25.12.2015. (prvo čitanje) - skinuta s dnevnog reda sjednice u skladu sa zahtjevom Ustavnopravne komisije

Tačka 14. - Razmatranje poslaničke inicijative Šemsudina Mehmedovića, podnesene na 21. sjednici, održanoj 10.12.2015., koja glasi: „Na osnovu člana 8. Poslovnika Predstavničkog doma Parlamentarne skupštine BiH, podnosim poslaničku inicijativu za formiranje komisije za izbor teksta himne Bosne i Hercegovine“, broj: 01-50-1-1565/15 - skinuta s dnevnog reda sjednice u skladu s obavještenjem Ustavnopravne komisije

Tačka 15. - Razmatranje poslaničke inicijative Senada Šepića, podnesene na 21. sjednici, održanoj 10.12.2015., koja glasi: „Predlažem da u dnevni red sljedeće sjednice utvrstite tačku pod nazivom: Osnivanje parlamentarne grupe za promociju osiguranja prava na slobodu vjere i ubjeđenja, u skladu s članom 18. Opće deklaracije o ljudskim pravima“, broj: 01-50-1-1574/15 - skinuta s dnevnog reda sjednice na zahtjev Zajedničke komisije za ljudska prava

Tačka 16. - Razmatranje poslaničke inicijative Senada Šepića, podnesene na 21. sjednici, održanoj 10.12.2015., koja glasi: „Predlažem da Kolegij Predstavničkog doma Parlamentarne skupštine BiH u dnevni red sljedeće sjednice uvrsti tačku pod nazivom: Informacija o slobodi govora i stanju medijskih sloboda u Bosni i Hercegovini, s posebnim naglaskom na napade na novinare“, broj: 01-50-1-1575/15 - skinuta s dnevnog reda sjednice na zahtjev Zajedničke komisije za ljudska prava.

Nakon ovih napomena otvorena je rasprava o dnevnom redu sjednice.

U raspravi o predloženom dnevnom redu i prijedlozima za njegove dopune učestvovali su: Senad Šepić, Nikola Špirić, Denis Bećirović, Šemsudin Mehmedović, Zaim Backović, Damir Arnaut, Aleksandra Pandurević, Staša Košarac, Dušanka Majkić, Amir Fazlić i Hanka Vajzović.

Senad Šepić izrazio je nezadovoljstvo zbog odluke Kolegija da se njegovi prijedlozi tačaka ne uvrste u dnevni red današnje sjednice, a odraz su aktuelnog stanja u državi.

Predsjedavajuća je napomenula da je Kolegij Predstavničkog doma u proširenom sastavu donio odluku da ne razmatra prijedloge tačaka dnevnog reda niti da ih uvrštava u dnevni red sjednice Doma ako predlagač ne dostavi i materijale za te tačke.

Nikola Špirić, Denis Bećirović, Šemsudin Mehmedović i Zaim Backović predložili su da se tačka 3. Prijedlog zakona o neradnim danima za vrijeme vjerskih praznika u Bosni i Hercegovini, predlagač: Vijeće ministara BiH, broj: 01,02-02-1-21/15, od 10.12.2015. (prvo čitanje), skine s dnevnog reda današnje sjednice.

Predsjedavajuća je rekla da, prema članu 71. stav (1) Poslovnika Predstavničkog doma, nije dozvoljeno izostavljanje obaveznih tačaka, a tačka 3. dnevnog reda to jeste.

Nakon pauze, koja je data na zahtjev Kluba SDA, Domu se obratio i ministar civilnih poslova BiH Adil Osmanović kao predstavnik predlagača Prijedloga zakona o neradnim danima za vrijeme vjerskih praznika u Bosni i Hercegovini, te povukao Prijedlog zakona s dnevnog reda današnje sjednice.

Predsjedavajuća je konstatirala da 23. sjednica Predstavničkog doma ima sljedeći

DNEVNI RED

1. Usvajanje Zapisnika 22. sjednice Predstavničkog doma Parlamentarne skupštine BiH;
2. Komentari na dobivene odgovore na poslanička pitanja;
3. Prijedlog zakona o štrajku zaposlenih u institucijama Bosne i Hercegovine, predlagač: Vijeće ministara BiH, broj: 01,02-02-1-24/15, od 10.12.2015. (prvo čitanje);
4. Prijedlog zakona o izmjeni i dopuni Zakona o ministarstvima i drugim organima uprave Bosne i Hercegovine, predlagač: Vijeće ministara BiH, broj: 01,02-02-1-25/15, od 10.12.2015. (prvo čitanje);
5. Prijedlog zakona o izmjenama i dopunama Zakona o upravi, predlagač: Vijeće ministara BiH, broj: 01,02-02-1-30/15, od 22.12.2015. (prvo čitanje);
6. Prijedlog zakona o izmjenama i dopunama Zakona o kontroli kretanja oružja i vojne opreme, predlagač: Vijeće ministara BiH, broj: 01,02-02-1-36/15, od 28.12.2015. (prvo čitanje);
7. Izvještaj za Bosnu i Hercegovinu za 2015. godinu, podnosilac: Evropska komisija, broj: 01,02-06-1538/15, od 3.12.2015.;
8. Akcioni plan za provođenje Reformske agende na nivou Vijeća ministara BiH, podnosilac: Vijeće ministara BiH, broj: 01,02-50-11-1383/15, od 28.10.2015.;
9. Informacija po zaključcima Predstavničkog doma, broj: 01-50-1-15-13/15, od 10.6.2015., usvojenim na 13. sjednici Predstavničkog doma, podnosilac: Regulatorna agencija za komunikacije BiH, materijal broj: 01-50-1-572-1/15, od 25.12.2015.;
10. Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za imenovanje jednog predstavnika akademske zajednice u Komisiju za izbor i praćenje rada Agencije za prevenciju korupcije i koordinaciju borbe protiv korupcije, predlagač: Zajednički kolegij oba doma Parlamentarne skupštine BiH, broj: 01,02-50-14-1654/15, od 21.12.2015.;

11. Imenovanje tri člana iz Predstavničkog doma u Zajedničku komisiju oba doma za postizanje identičnog teksta Zakona o azilu (predlagač: Vijeće ministara BiH, zakon broj: 01,02-02-1-12/15, od 6.8.2015.).

Ad.1. Usvajanje Zapisnika 22. sjednice Predstavničkog doma Parlamentarne skupštine BiH

Predsjedavajuća je napomenula da je poslanicima dostavljen Zapisnik.

Nije bilo rasprave.

Zapisnik 22. sjednice usvojen je s 36 glasova "za" (iz Federacije BiH 24, iz Republike Srpske 12), bez glasova „protiv“ i tri glasa „suzdržan“.

Ad.2. Komentari na dobivene odgovore na poslanička pitanja

Predsjedavajuća je podsjetila da su, u skladu s članom 174. Poslovnika, do ove sjednice Doma pitanja i inicijative u pisanoj formi postavili poslanici:

- **Damir Arnaut** – postavio tri pitanja ministru vanjske trgovine i ekonomskih odnosa BiH i dva pitanja ministru vanjskih poslova BiH;
- **Nikola Lovrinović** – postavio pitanje Uredu za reviziju institucija BiH;
- **Denis Bećirović** - uputio inicijativu Kolegiju Predstavničkog doma;
- **Dužanka Majkić** – uputila inicijativu Kolegiju Predstavničkog doma.

Sadržaj postavljenih pitanja i inicijativa je sljedeći:

Damir Arnaut

Pitanja postavljena ministru vanjske trgovine i ekonomskih odnosa BiH:

1. „Da li je Ministarstvo vanjske trgovine i ekonomskih odnosa BiH realiziralo zaključke Predstavničkog doma Parlamentarne skupštine BiH s 53. sjednice, od 19.9.2013. (broj: 01/a-50-1-15-53/13, od 19.9.2013.), a koji se odnose na izradu izmjena i dopuna Zakona o hrani BiH, Zakona o veterinarstvu BiH te Zakona o poljoprivredi, ishrani i ruralnom razvoju BiH?
2. Kada će Vijeće ministara BiH razmatrati predmetne nacрте izmjena i dopuna Zakona o hrani BiH, Zakona o veterinarstvu BiH te Zakona o poljoprivredi, ishrani i ruralnom razvoju BiH, a s ciljem provođenja navedenih zaključaka Predstavničkog doma?
3. Kada će Vijeće ministara BiH dostaviti Parlamentarnoj skupštini BiH prijedloge izmjena i dopuna navedenih zakona na razmatranje i usvajanje, a opet s ciljem provođenja navedenih zaključaka Predstavničkog doma?“

Pitanja postavljena ministru vanjskih poslova BiH:

1. „Koliko je akata/dopisa supstantivne prirode (iz domena rada Sektora za bilateralne odnose i Sektora za multilateralne odnose, odnosno kabineta ministra i zamjenika ministra, sekretara, Odjela za međunarodnu naučnu, tehničku, obrazovnu, kulturnu i sportsku saradnju, Ureda za posebne diplomatske aktivnosti i slično) svaki pojedinačni DKPBiH dostavio sjedištu MVPBiH u 2013., 2014. i 2015. godini?
2. Koliko kontakata je svaki DKPBiH pojedinačno ostvario u 2013., 2014. i 2015. godini, te koliko kontakata je ostvario svaki diplomata pojedinačno unutar svog DKP-a BiH u tim godinama, uključujući i nivo ostvarenih kontakata (šef države/šef vlade, ministar, član parlamenta...)?

Nikola Lovrinović

Pitanje postavljeno Uredu za reviziju institucija BiH:

1. „Može li Ured za reviziju institucija BiH, odnosno ima li mandat vršiti reviziju transparentnosti rada institucija BiH kako je to uradio u augustu 2015. godine? Ulazi li Ured za reviziju institucija BiH na ovaj način u oblasti zakonodavnopravnog ili upravnopravnog nadzora jer, prema nekim informacijama, slično ste postupali u nekim drugim situacijama? Dakle, molim jasan odgovor o ovlaštenjima u skladu s čl. 3., 13. i 16. Zakon o reviziji institucija Bosne i Hercegovine.”

Denis Bećirović

Inicijativa upućene Kolegiju Predstavničkog doma:

1. „U skladu s članom 8. Poslovnika Predstavničkog doma Parlamentarne skupštine BiH, podnosim poslaničku inicijativu kojom se zadužuje Vijeće ministara BiH da najkasnije u roku od 30 dana od dana usvajanja ove inicijative u Predstavničkom domu Parlamentarne skupštine BiH izradi i u parlamentarnu proceduru dostavi izvještaj o privlačenju direktnih stranih investicija u Bosnu i Hercegovinu u 2015. godini s prijedlogom mjera za unapređenje politike privlačenja stranih investicija.“

Dužanka Majkić

Inicijativa upućena Kolegiju Predstavničkog doma:

1. „U skladu s članom 8. Poslovnika Predstavničkog doma Parlamentarne skupštine BiH, pokrećem poslaničku inicijativu za uvrštavanje u dnevni red sjednice Predstavničkog doma PSBiH sljedeće tačke: Analiza stanja u Ministarstvu vanjskih poslova BiH i diplomatsko-konzularnoj mreži BiH.“

U skladu s članom 174. Poslovnika, tokom ove sjednice Doma pitanja i inicijative u pisanoj formi postavili su poslanici:

- **Senad Šepić** – dvije inicijative uputio Kolegiju Predstavničkog doma, jednu inicijativu Vijeću ministara BiH, Ministarstvu komunikacija i prometa BiH i Direkciji za evropske integracije i postavio dva pitanja Vijeću ministara BiH, Vladi Federacije BiH i vladama kantona u BiH,
- **Denis Bećirović** – postavio sedam pitanja predsjedavajućem Vijeća ministara BiH i Vijeću ministara BiH,
- **Momčilo Novaković** – postavio pitanje predsjedavajućem Vijeća ministara BiH.

Sadržaj postavljenih pitanja i inicijativa je sljedeći:

Senad Šepić

Inicijative upućene Kolegiju Predstavničkog doma:

1. „Predstavnički dom Parlamentarne skupštine BiH obavezuje Vijeće ministara BiH i druge nadležne institucije da hitno pripreme i Parlamentarnoj skupštini BiH pošalju informaciju o stanju i pojavama vršnjačkog nasilja i nasilja među djecom u Bosni i Hercegovini, s prijedlogom mjera.“
2. „Obavezuju se Vijeće ministara BiH i druge nadležne institucije i tijela BiH da, u skladu s odredbama Ugovora između Republike Hrvatske i Bosne i Hercegovine o graničnim prijelazima, hitno pokrenu postupak izmjena i dopuna spomenutog ugovora, a u pravcu osiguranja prekategoriizacije malograničnih prijelaza Zagrad – Pašin Potok, Plazikur – Gejkovac i Hadžin Potok – Bogovlja u granične prijelaze za međunarodni saobraćaj putnika. Predstavnički dom PSBiH zadužuje Vijeće ministara BiH da o pokrenutim aktivnostima u ovom pravcu obavijesti ovaj dom najkasnije u roku od 30 dana.“

Inicijativa upućena Vijeću ministara BiH, Ministarstvu komunikacija i prometa BiH i Direkciji za evropske integracije:

1. „Predlažem da Vijeće ministara BiH hitno pokrene aktivnosti na obnovi i stavljanju u funkciju unske pruge te o preduzetim aktivnostima obavijesti Predstavnički dom Parlamentarne skupštine BiH najkasnije u roku od 30 dana.“

Pitanja upućena Vijeću ministara BiH, Vladi Federacije BiH i vladama kantona u BiH:

1. „Na osnovu kojih propisa je u našoj zemlji regulirano da je pravo na zdravstvenu zaštitu pacijenata/građana uslovljeno i isključivo vezano za općinu - mjesto prebivališta i koje trenutno onemogućava da se pacijentu, ako se zadesi u drugoj općini, čak i susjednoj i onoj koja pripada istom kantonu, pruži zdravstvena zaštita po istom nivou i pravu kao da je u zdravstvenoj ustanovi u općini u kojoj ima prebivalište?“
2. „Šta nadležne institucije konkretno rade na olakšavanju ovih propisa i osiguravanju zdravstvene zaštite za sve na prostoru cijele zemlje?“

Denis Bećirović

Pitanja upućena predsjedavajućem Vijeća ministara BiH i Vijeću ministara BiH:

1. „Šta ste konkretno učinili da se u toku dosadašnjeg dijela mandata prevaziđu etničko-teritorijalni principi na kojima se, nažalost, u BiH često insistira, a koji su u potpunoj koliziji sa savremenom ekonomskom logikom, aktuelnim načelima mobilnosti i operativnosti globalnog i regionalnog poslovanja, obrazovanja, transfera znanja i tehnologija?“
2. „Šta je konkretno učinilo Vijeće ministara BiH s ciljem izgradnje društva jednakih šansi za sve građane i narode u BiH?“
3. „Šta je konkretno učinilo Vijeće ministara BiH s ciljem jačanja vladavine prava i provođenja reforme javne uprave?“
4. „Šta je konkretno učinilo Vijeće ministara BiH s ciljem smanjenja javne potrošnje, stabiliziranja javnih finansija i ekonomije BiH?“

5. „Šta je konkretno učinilo Vijeće ministara BiH s ciljem pokretanja kapitalnih investicija, stvaranja povoljnijeg poslovnog okruženja za privlačenje stranih investicija?“
6. „Šta je konkretno učinilo Vijeće ministara BiH s ciljem podsticanja i ohrabrivanja domaćih investitora da svoj kapital ulože u profitabilne sektore industrije, poljoprivrede, energije i turizma?“
7. „Šta je konkretno učinilo Vijeće ministara BiH s ciljem povećanja kvaliteta i kvantiteta domaćih proizvoda?“

Momčilo Novaković

Pitanje upućeno Vijeću ministara BiH:

1. „Da li je Asocijacija kompozitora - muzičkih stvaralaca Bosne i Hercegovine (AMUS) registrirana u skladu s važećim zakonima u BiH, da li je i kada proveden nadzor nad radom ove asocijacije i šta je njime utvrđeno, te da li je Vijeće ministara BiH upoznato s problemom u primjeni Zakona o kolektivnom ostvarivanju autorskog i srodnih prava („Sl. glasnik BiH“, broj 63/10) i da li je planirano preduzimanje određenih mjera u predmetnoj oblasti?“

Predsjedavajuća je rekla da su do današnje sjednice dostavljeni sljedeći odgovori na poslanička pitanja:

- na pitanje **Maje Gasal-Vražalice**, postavljeno na 1. posebnoj zajedničkoj sjednici o temi: „Poslanici/delegati pitaju – Vijeće ministara BiH odgovara“, Vijeće ministara BiH dostavilo je odgovor Ministarstva civilnih poslova BiH, a na pitanje postavljeno u usmenoj formi na 21. sjednici, Vijeće ministara BiH dostavilo je odgovor Ministarstva finansija i trezora BiH;
- na pitanje **Nikole Lovrinovića**, postavljeno u pisanoj formi, odgovor je dostavilo Visoko sudsko i tužilačko vijeće BiH;
- na pitanje **Safera Demirovića**, postavljeno u usmenoj formi na 21. sjednici, odgovor je dostavila Uprava za indirektno oporezivanje BiH. Isti odgovor prosljedilo je i Vijeće ministara BiH;
- na pitanje **Nikole Špirića**, postavljeno u usmenoj formi na 21. sjednici, Vijeće ministara BiH dostavilo je odgovor Ministarstva civilnih poslova BiH;
- na pitanje **Miroslava Milovanovića**, postavljeno u usmenoj formi na 21. sjednici, odgovor je dostavljen iz Ureda predsjedavajućeg Vijeća ministara BiH;
- na pitanje **Predraga Kožula**, postavljeno u usmenoj formi na 20. sjednici, odgovor je dostavilo Ministarstvo civilnih poslova BiH. Isti odgovor prosljedilo je i Vijeće ministara BiH;
- na inicijativu **Jasmina Emrića**, odgovor je dostavila Uprava za indirektno oporezivanje BiH;
- na pitanje **Hanke Vajzović**, postavljeno u usmenoj formi na 20. sjednici, odgovor je dostavilo Ministarstvo sigurnosti BiH.

Dostavljene odgovore komentirali su poslanici: Maja Gasal-Vražalica, Damir Arnaut, Hanka Vajzović, Nikola Lovrinović, Zaim Backović.

Šemsudin Mehmedović zatražio je urgencije za dostavu odgovora na pitanja postavljena Ministarstvu komunikacija i prometa BiH, predsjedavajućem Vijeća ministara BiH i Ministarstvu sigurnosti BiH.

Maja Gasal-Vražalica istakla je da je nezadovoljna dobivenim odgovorom od Ministarstva civilnih poslova BiH, te je zatražila da joj se dostavi dopuna odgovora.

Damir Arnaut zatražio je da mu Ministarstvo vanjskih poslova BiH dostavi odgovor na pitanje postavljeno 6.11.2015. i da mu Ministarstvo pravde BiH dostavi odgovor na usmeno postavljeno pitanje na 20. sjednici Doma istog sadržaja, kao što je bio i odgovor ministra pravde BiH dat na sjednici Doma.

Hanka Vajzović rekla je da je zadovoljna dobivenim odgovorom, te da će ga komentirati na nekoj od narednih sjednica.

Nikola Lovrinović izrazio je nezadovoljstvo dobivenim odgovorom, te rekao da će odgovor na isto pitanje zatražiti od druge institucije.

Ad.3. Prijedlog zakona o štrajku zaposlenih u institucijama Bosne i Hercegovine, predlađač: Vijeće ministara BiH, broj: 01,02-02-1-24/15, od 10.12.2015. (prvo čitanje)

Predsjedavajuća je dala uvodne napomene i otvorila raspravu.

U raspravi su učestvovali: Hazim Rančić, Zaim Backović, Nermina Kapetanović i Denis Bećirović.

Prijedlog zakona o štrajku zaposlenih u institucijama Bosne i Hercegovine usvojen je u prvom čitanju, s 36 glasova „za“ (iz Federacije BiH 23, iz Republike Srpske 13), bez glasova „protiv“ i tri glasa „suzdržan“.

Ad.4. Prijedlog zakona o izmjeni i dopuni Zakona o ministarstvima i drugim organima uprave Bosne i Hercegovine, predlađač: Vijeće ministara BiH, broj: 01,02-02-1-25/15, od 10.12.2015. (prvo čitanje)

Predsjedavajuća je dala uvodne napomene i otvorila raspravu.

U raspravi je učestvovao Momčilo Novaković.

Prijedlog zakona o izmjeni i dopuni Zakona o ministarstvima i drugim organima uprave Bosne i Hercegovine usvojen je u prvom čitanju, s 38 glasova „za“ (iz Federacije BiH 26, iz Republike Srpske 12), bez glasova „protiv“ i jednim glasom „suzdržan“.

Ad.5. Prijedlog zakona o izmjenama i dopunama Zakona o upravi, predlađač: Vijeće ministara BiH, broj: 01,02-02-1-30/15, od 22.12.2015. (prvo čitanje)

Predsjedavajuća je dala uvodne napomene i otvorila raspravu.

U raspravi su učestvovali: Hazim Rančić, Nermina Kapetanović, Borjana Krišto i Damir Arnaut.

Prijedlog zakona o izmjenama i dopunama Zakona o upravi usvojen je u prvom čitanju, s 34 glasa „za“ (iz Federacije BiH 21, iz Republike Srpske 13), pet glasova „protiv“ i bez glasa „suzdržan“.

Poslanik Damir Arnaut predložio je zaključak koji glasi: *„Zadužuje se Vijeće ministara BiH da u poslovničkom roku dostavi amandmane kojim će se iz člana 7. Prijedloga zakona otkloniti mogućnost da članovi Parlamentarne skupštine BiH imaju šefove kabineta i savjetnike, te da pripremi druge izmjene u skladu s raspravom Doma.“*

Zaključak je usvojen s 30 glasova „za“ (iz Federacije BiH 22, iz Republike Srpske osam), tri glasa „protiv“ i šest glasova „suzdržan“.

Ad.6. Prijedlog zakona o izmjenama i dopunama Zakona o kontroli kretanja oružja i vojne opreme, predlagač: Vijeće ministara BiH, broj: 01,02-02-1-36/15, od 28.12.2015. (prvo čitanje)

Nakon uvodnih napomena, predsjedavajuća je otvorila raspravu.

Diskutirala je Hanka Vajzović.

Prijedlog zakona o izmjenama i dopunama Zakona o kontroli kretanja oružja i vojne opreme usvojen je u prvom čitanju, s 38 glasova „za“ (iz Federacije BiH 26, iz Republike Srpske 12), bez glasova „protiv“ i jednim glasom „suzdržan“.

Ad.7. Izvještaj za Bosnu i Hercegovinu za 2015. godinu, podnosilac: Evropska komisija, broj: 01,02-06-1538/15, od 3.12.2015.

Predsjedavajuća je dala uvodne napomene i otvorila raspravu.

U raspravi su učestvovali: Nikola Lovrinović, Dušanka Majkić, Milica Marković, Senad Šepić, Borislav Bojić, Denis Bećirović, Aleksandra Pandurević, Hazim Rančić, Staša Košarac, Momčilo Novaković, Sadik Ahmetović, Maja Gasal-Vražalica, Mirsad Mešić, Mirsad Đonlagić, Šefik Džaferović, Zaim Backović, Damir Arnaut i Safer Demirović.

Domu se obratio zamjenik predsjedavajućeg Vijeća ministara BiH i ministar vanjske trgovine i ekonomskih odnosa BiH, Mirko Šarović.

U raspravi su zaključke predložili: Borislav Bojić, Nikola Lovrinović i Senad Šepić.

Nakon rasprave, predsjedavajuća je dala na glasanje Izvještaj za Bosnu i Hercegovinu za 2015. godinu. Izvještaj je primljen k znanju s 31 glasom „za“ (iz Federacije BiH 19, iz Republike Srpske 12), bez glasova „protiv“ i osam glasova „suzdržan“.

Zatim se pristupilo glasanju o prijedlozima zaključaka iznesenim u raspravi.

Zaključak Borislava Bojića usvojen je s 35 glasova „za“ (iz Federacije BiH 23, iz Republike Srpske 12), bez glasova „protiv“ i četiri glasa „suzdržan“. Zaključak glasi: „*U vezi s budućim postupanjem i razmatranjem ovih izvještaja, predlažem da ubuduće, kada Parlamentarna skupština BiH zaprimi izvještaje Evropske komisije, oni budu dostavljeni i radnim tijelima Parlamentarne skupštine BiH u dijelu koji se odnosi na rad tih tijela PSBiH, kako bismo se upoznali sa sadržajem i po potrebi pravovremeno reagirali na sadržaj.*“

Zaključci Nikole Lovrinovića usvojeni su s 31 glasom „za“ (iz Federacije BiH 24, iz Republike Srpske sedam), jednim glasom „protiv“ i sedam glasova „suzdržan“. Zaključci glase:

1. *Zadužuje se Vijeće ministara BiH da pripremi Akcioni plan za provođenje prioriteta iz Izvještaja za Bosnu i Hercegovinu za 2015. godinu.*
2. *Zadužuje se Vijeće ministara BiH da zaduži sve institucije da mjere iz Akcionog plana za provođenje prioriteta iz Izvještaja za Bosnu i Hercegovinu za 2015. godinu budu uključene u planove rada institucija za 2016. godinu.*
3. *Obavezuje se Vijeće ministara BiH da informira Parlamentarnu skupštinu BiH o provođenju prioriteta u redovnom godišnjem izvještavanju za 2016. godinu.*

„Za“ prijedlog zaključka Senada Šepića su glasala 22 poslanika (iz Federacije BiH 21, iz Republike Srpske jedan), „protiv“ 12, a „suzdržanih“ je bilo pet poslanika. Predsjedavajuća je konstatirala da nema potrebne entitetske većine. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 23 glasova „za“, 15 glasova „protiv“ (iz Federacije BiH četiri, iz Republike Srpske 11) i jednim glasom „suzdržan“, prijedlog zaključka nije usvojen, a on glasi: „Predstavnički dom Parlamentarne skupštine BiH zadužuje Vijeće ministara BiH da hitno usvoji Državni program integriranja, u kojem treba jasno utvrditi plan ispunjavanja kriterija za članstvo i plan usklađivanja domaćeg zakonodavstva sa zakonodavstvom Evropske unije.“

Ad.8. Akcioni plan za provođenje Reformske agende na nivou Vijeća ministara BiH, podnosilac: Vijeće ministara BiH, broj: 01,02-50-11-1383/15, od 28.10.2015.

Predsjedavajuća je dala uvodne napomene.

U raspravi su učestvovali: Predrag Kožul, Senad Šepić, Dušanka Majkić, Hanka Vajzović, Aleksandra Pandurević, Jasmin Emrić, Denis Bećirović i Lazar Prodanović.

Kratko je komentirao zamjenik predsjedavajućeg Vijeća ministara BiH i ministar vanjske trgovine i ekonomskih odnosa BiH, Mirko Šarović.

Nakon rasprave, predsjedavajuća je dala na glasanje Akcioni plan za provođenje Reformske agende na nivou Vijeća ministara BiH. Akcioni plan primljen je k znanju s 32 glasa „za“ (iz Federacije BiH 20, iz Republike Srpske 12), četiri glasa „protiv“ i tri glasa „suzdržan“.

U raspravi zaključke su predložili Dušanka Majkić i Jasmin Emrić.

Zaključak Dušanke Majkić usvojen je s 24 glasa „za“ (iz Federacije BiH 17, iz Republike Srpske sedam), devet glasova „protiv“ i šest glasova „suzdržan“. Zaključak glasi: *„Predstavnički dom Parlamentarne skupštine BiH traži od Vijeća ministara BiH da do 28.2.2016. dostavi precizne planove institucija BiH zaduženih Akcionim planom za provođenje Reformske agende s jasnim popisom svih aktivnosti, nosiocima aktivnosti i rokovima realizacije.“*

"Za" prijedlog zaključka Jasmina Emrića je glasalo 28 poslanika (iz Federacije BiH 26, iz Republike Srpske dva), „protiv“ 10, a „suzdržan“ je bio jedan poslanik. Predsjedavajuća je konstatirala da nema potrebne entitetske većine. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 28 glasova „za“, 11 glasova „protiv“ (iz Republike Srpske) i bez glasova „suzdržan“, prijedlog zaključka nije usvojen, a on glasi: *„Predstavnički dom Parlamentarne skupštine BiH zadužuje Vijeće ministara BiH da ažurira i uskladi Akcioni plan za provođenje Reformske agende s preporukama iz Izvještaja za Bosnu i Hercegovinu za 2015. godinu, te da ih prema prioritetima uvrsti u Plan aktivnosti, s nosiocima i rokovima za realiziranje.“*

Ad. 9. Informacija po zaključcima Predstavničkog doma, broj: 01-50-1-15-13/15, od 10.6.2015., usvojenim na 13. sjednici Predstavničkog doma, podnosilac: Regulatorna agencija za komunikacije BiH, materijal broj: 01-50-1-572-1/15, od 25.12.2015.

Predsjedavajuća je dala uvodne napomene.

U raspravi su učestvovali: Mladen Bosić, Senad Šepić, Zaim Backović, Lazar Prodanović, Dušanka Majkić, Momčilo Novaković i Staša Košarac.

Domu se obratio v.d. generalnog direktora Regulatorne agencije za komunikacije Predrag Kovač.

Nakon rasprave, Dom je, s 31 glasom „za“ (iz Federacije BiH 24, iz Republike Srpske sedam), bez glasova „protiv“ i osam glasova „suzdržan“, primio k znanju Informaciju po zaključcima Predstavničkog doma, broj: 01-50-1-15-13/15, od 10.6.2015., usvojenim na 13. sjednici Predstavničkog doma.

Zatim je predsjedavajuća dala na glasanje zaključke sadržane u Mišljenju Komisije za saobraćaj i komunikacije. Zaključci su usvojeni s 29 glasova „za“ (iz Federacije BiH 21, iz Republike Srpske osam), bez glasova „protiv“ i deset glasova „suzdržan“. Zaključci glase:

- 1. Predstavnički dom Parlamentarne skupštine BiH konstatira da Regulatorna agencija za komunikacije BiH nije realizirala zaključke donesene na 13. sjednici Predstavničkog doma, a u vezi s inicijativom poslanika Mladena Bosića o cijenama usluga mobilnih operatera u Bosni i Hercegovini, te traži od Agencije da ih realizira u najkraćem mogućem roku, a najduže u roku od 120 dana.*
- 2. Predstavnički dom Parlamentarne skupštine BiH traži od Vijeća ministara BiH da što prije donese novu Politiku sektora telekomunikacija BiH.*

Ad.10. Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za imenovanje jednog predstavnika akademske zajednice u Komisiju za izbor i praćenje rada Agencije za prevenciju korupcije i koordinaciju borbe protiv korupcije, predlagač: Zajednički kolegij oba doma Parlamentarne skupštine BiH, broj: 01,02-50-14-1654/15, od 21.12.2015.

Predsjedavajuća je dala uvodne napomene i otvorila raspravu. U raspravi su učestvovali Denis Bećirović i Maja Gasal-Vražalica.

Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za imenovanje jednog predstavnika akademske zajednice u Komisiju za izbor i praćenje rada Agencije za prevenciju korupcije i koordinaciju borbe protiv korupcije usvojen je s 21 glasom „za“ (iz Federacije BiH 14, iz Republike Srpske sedam), 14 „protiv“ i četiri „suzdržana“ glasa. Za članove Privremene zajedničke komisije iz Predstavničkog doma imenovani su poslanici: Mirsad Donlagić, Predrag Kožul i Borislav Bojić.

Ad.11. Imenovanje tri člana iz Predstavničkog doma u Zajedničku komisiju oba doma za postizanje identičnog teksta Zakona o azilu (predlagač: Vijeće ministara BiH, zakon broj: 01,02-02-1-12/15, od 6.8.2015.)

Nakon uvodnih napomena predsjedavajuće kratko je komentirao Zaim Backović.

Na prijedlog Kolegija Doma, u Zajedničku komisiju oba doma za postizanje identičnog teksta Zakona o azilu, s 21 glasom „za“ (iz Federacije BiH 14, iz Republike Srpske sedam), deset glasova „protiv“ i osam „suzdržanih“ glasova, imenovani su poslanici: Damir Arnaut, Nikola Lovrinović i Momčilo Novaković.

Sjednica je završena u 16,45 sati.

Sastavni dio Zapisnika je transkript 23. sjednice Predstavničkog doma.

SEKRETAR
PREDSTAVNIČKOG DOMA

Marin Vukoja

PREDSJEDAVAJUĆA
PREDSTAVNIČKOG DOMA

Borjana Krišto